

10/09/2002

Duke of Gloucester menghadap Yang di-Pertuan Agong

KUALA LUMPUR, Isnin - Duke of Gloucester dan isterinya hari ini menghadap Yang di-Pertuan Agong Tuanku Syed Sirajuddin dan Raja Permaisuri Agong Tuanku Fauziah di Istana Negara.

Pasangan diraja Britain itu melakukan lawatan rasmi ke Kuala Lumpur selama tiga hari mulai semalam bagi memperkukuhkan hubungan di antara Britain dan Malaysia.

Kunjungan itu juga serentak dengan lawatan dua misi perdagangan daripada Persatuan Pembekal Pendidikan Britain dan Biro Perundingan dan Pembinaan Britain.

Duke of Gloucester adalah presiden kedua-dua badan itu. Sepupu Ratu Elizabeth II itu dan Duchess of Gloucester, juga akan mengadakan perjumpaan dengan Perdana Menteri Datuk Seri Dr Mahathir Mohamad, di Putrajaya esok. - Bernama